



KENYATAAN MEDIA
SITUASI TERKINI JANGKITAN COVID-19
DI NEGARA BRUNEI DARUSSALAM
3 April 2020

1. Pada hari ini, Jumaat, 09 Syaaban 1441 bersamaan 03 April 2020, Kementerian Kesihatan ingin memaklumkan kepada orang ramai mengenai **1 kes baru** yang telah disahkan dijangkiti COVID-19 di negara ini. Ini bermakna **jumlah keseluruhan kes COVID-19 di negara ini adalah 134 orang**.
 - Kes 134 berumur 22 tahun adalah seorang pelajar dan warga tempatan yang telah pulang ke negara ini dari Amerika Syarikat melalui United Kingdom dengan menaiki pesawat Royal Brunei BI004 (tempat duduk 36G) yang tiba pada 29 Mac 2020. Beliau telah menjalani pengasingan diri sebaik saja tiba ke negara ini dan tidak mempunyai tanda-tanda jangkitan.
2. Kementerian Kesihatan juga ingin memaklumkan kepada orang ramai bahawa Alhamdulillah, dengan izin Allah Subhanahu Wa Ta'ala jua, pada hari ini **9 lagi kes** yang dirawat di Pusat Pengasingan Kebangsaan telah disahkan sembuh dan dibenarkan untuk pulang ke rumah, membawa **jumlah keseluruhan yang telah sembuh kepada 65 orang**. Ini bermakna terdapat 68 kes yang masih dirawat di Pusat berkenaan. Daripada jumlah tersebut, 3 orang masih dalam

keadaan kritikal dan memerlukan bantuan mesin pernafasan di Unit Rawatan Intensif di Pusat tersebut di mana salah seorang daripadanya masih memerlukan bantuan mesin tambahan *heart/lung machine (ECMO)*. Sementara itu, selebihnya adalah dalam keadaan yang baik.

3. Sementara itu, pada masa ini, seramai 440 orang sedang menjalani kurantin, menurut Akta Penyakit Berjangkit Penggal 204. Manakala seramai 1,898 orang telah menamatkan tempoh kurantin dan dalam keadaan yang baik. Sejak awal Januari 2020, sebanyak 7,566 ujian makmal bagi COVID-19 telah dijalankan, yang membawa nisbah kepada 1 dalam 57 orang ramai yang sudah dibuat pemeriksaan bagi COVID-19.
4. Pemantauan situasi pada masa ini menunjukkan jumlah ujian makmal yang dilakukan di Negara Brunei Darussalam telah meningkat yang boleh membawa kepada kapasiti maksima sebanyak 1,000 ujian sehari. Di samping itu, terdapat penurunan jumlah kes yang disahkan dan dilaporkan setiap hari serta peningkatan jumlah kes telah sembuh. Ini adalah di antara tanda-tanda yang menunjukkan bahawa wabak COVID-19 di negara ini telah dapat dikawal dengan baik. Walau bagaimanapun, rakyat dan penduduk negara ini tidak boleh leka dan lalai kerana keadaan pandemik COVID-19 masih berkembang dengan cepat di negara-negara lain. Pada hari ini saja, jumlah kes yang dilaporkan di seluruh dunia telah melebihi satu juta orang dengan lebih 50 ribu kematian. Oleh itu, walaupun pada hakikatnya, Negara Brunei Darussalam telah berhasil "*in flattening the curve*" namun negara kita ini masih lagi di bawah ancaman kemasukan virus tersebut dari negara luar. Disarankan agar

masyarakat akan terus berdoa agar negara kitani akan dapat mengawal penularan wabak COVID-19 ini dan mendoakan pesakit-pesakit kita diberi kesembuhan sepenuhnya serta negara sentiasa dilindungi Allah Subhanahu Wa Ta'ala jua. Aammiin

5. Memang pada lazimnya, sesuatu wabak hanya akan diisytiharkan tamat apabila tidak ada kes lagi dilaporkan dalam masa dua kali tempoh inkubasi jangkitan (bagi COVID-19, ini adalah 2 kali 14 hari, iaitu 28 hari). Akan tetapi, virus ini dijangkakan mungkin tidak akan dapat dihapuskan sama sekali terutama sekali mengambilkira penularannya ditahap global yang belum dapat dikawal pada masa ini. Oleh yang demikian, adalah sangat penting bagi kita untuk sama-sama mengawal sebaik mungkin penularan jangkitan COVID-19 di negara ini supaya sekurang-kurangnya sebahagian daripada larangan-larangan yang ada pada masa sekarang dapat dikurangkan dengan perlahan-lahan dan secara berperingkat-peringkat. Pengurangan larangan-larangan ini hanya akan dapat dilaksanakan selepas pihak Kementerian Kesihatan dan agensi-agensi Kerajaan Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam yang lain meneliti dan mengambilkira keberhasilan usaha-usaha pengawalan di negara ini serta juga di peringkat serantau dan global.
6. Sementara itu, Kementerian Kesihatan ingin menjelaskan mengenai pengiraan hari bagi pengasingan diri (*self-isolation*) bagi mereka yang tiba ke Negara ini. Sepertimana yang diketahui, tempoh pengasingan diri adalah selama 14 hari dari hari ketibaan. Walau bagaimanapun hari ketibaan adalah dinamakan hari

0 ataupun tidak dikira. Sebagai contoh bagi mereka yang telah tiba pada 20 Mac 2020, pengasingan diri akan tamat pada 4 April 2020 iaitu hari ke 15 setelah menamatkan tempoh hari ke 14. Ini adalah bagi memastikan tempoh pengasingan dijalankan dengan sepenuhnya. Kementerian Kesihatan juga ingin memaklumkan kepada ibu bapa dan penjaga untuk bekerjasama dan mematuhi masa yang telah dijadualkan untuk mengambil anak-anak abiskita pulang dari tempat pengasingan masing-masing.

7. Untuk maklumat lanjut dan perkembangan terkini, orang ramai boleh melayari laman web Kementerian Kesihatan iaitu **www.moh.gov.bn** atau menghubungi **Talian Nasihat Kesihatan 148** (pada bila-bila masa) atau melalui aplikasi **healthinfo.gov.bn**.

- **TAMAT** -

Rujukan : KK/PR/2

Tarikh : 09 Syaaban 1441H / 03 April 2020